



PARLAMENTO DI KÒRSOU

Parliament of Curaçao • Parlamento de Curazao • Staten van Curaçao

Presidente di Parlamento
Sra. America-Francisca
Wilheminaplein 4
Presente

Kòrsou, 30 di sèptèmber 2024

Tópiko: Invitashon FKP pa bishita proyekto di kas na Repùblika Dominikana !

Apresiabel sra. Presidente America-Francisca,

Suskrito a tuma nota di un invitashon di Fundashon Kas Popular na parlamento di Kòrsou, pa bishitá un proyekto di kas na Repùblika Dominikana. Mas i mas ta mi konvensí ku nos no por ta serio ku e tema di bibienda na Kòrsou. Resientemente parlamento a biaha pa wak e proyekto 'Mi Casa Ya' na Colombia, awor ta planeá un siguiente bishita pa Repùblika Dominikana pa WAK kas.

Mi kier rekordá señora presidente ku Fundashon Kas Popular no a entregá ningun kuenta anual den e último 11 añanan ku a pasa, ni na gobièrnu, ni na parlamento. Tin keho insistente i pruebanan palpabel di un falta di mantenshon enorme pa ku e kasnan ku FKP ta manehá pa gobièrnu. Asina leu ku tin famianan ta biba, tur dia den situashonnan di bibienda ku ta inhumano.

Awor ku pena mi tin ku konstatá ku FKP a bira agensia di biahe ku ta organisá bishitá di trabou pa Parlamento. Señora Presidente athunto na e karta aki, mi ta pone algun potrèt di estado di e kasnan ku FKP mester mantené pa gobièrnu. I hasi e petishon na Fundashon Kas Popular pa sí, ta sèn di mas e tin den su presupuesto e bai drecha e kasnan aki, promé ku invitá Parlamento na biahe pa wak kas. I Parlamento por kontribuí ku fondonan pa drecha e kasnan aki. Pa asina algun famia por drumi den un kas ku nan dak no ta basha awa, ku nan muraya no ta di sker, ku nan fundeshi di kas no ta sak i ku komehein no a kome nan bentana i porta. Ki dia FKP a invitá Parlamento pa bai wak e kasnan ku pais a dun'é pa manehá ?

Kon nos komo Parlamento por aseptá e tipo di komportashon aki di FKP i ningun otro fundashon, ku no ta duna transparensia pa ku sènnan di pueblo, no ta kuida propiedat di pueblo, ta envolví tur dia di nobo den skandalnan ku figuranan intransparente?

Señora Presidente promé ku aseptá e invitashon di Fundashon Kas Popular aki, por hasi Fundashon Kas Popular e siguiente pregunta, "ki tin di bèrdat ku un hotèl a paga hür debidamente i ku FKP resientemente a pèrdè tur e míles di florin di hür aki? I ku e hotèl no kier hasi negoshi mas ku FKP?"



PARLAMENTO DI KÒRSOU

Parliament of Curaçao • Parlamento de Curazao • Staten van Curaçao

Parlamento aseptá e invitashon di FKP aki, ta meskos ku aseptá e komportashon no transparente di FKP. Ta hasi uso di sèn di pueblo pa gosa, na lugá di hasi e trabou. Un bèrgwensa total. Ora FKP por duna transparensia di e kasnan na Kòrsou, e invitá parlamento wak kasnan den ekterior.

Ku esaki mi ta pidi sra. Presidente komo kabes di Parlamento pa manda e invitashon aki bèk pa FKP. I no dirigí e karta aki pa e komishon di VVRP.

Atentamente,

Ana Maria Pauletta

Miembronan di Parlamento, Partido Alternativa Real















